

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 247657 24 St
Zenica, 19.01.2026. godine

Općinski sud u Zenici, stečajni sudija Amela Sinanović, u stečajnom postupku koji je pokrenut po prijedlogu predlagatelja POLJOPRIVREDNA ZADRUGA „NATURA“ ZENICA, ul. Kamberovića čikma bb, Zenica, za provođenje stečajnog postupka nad navedenim pravnim licem, nakon održanog ročišta dana 01.10.2025.godine, u prisustvu privremenog stečajnog upravnika Alić Izudina, zastupnika po zakonu Muslić Rifata, direktora, van ročišta, dana 19.01.2026. godine, donio je sljedeće:

R J E Š E N J E

Otvora se i zaključuje stečajni postupak nad POLJOPRIVREDNA ZADRUGA „NATURA“ ZENICA, ul. Kamberovića čikma bb, Zenica, MBS : 43-05-0028-11 zbog nepostojanja imovine za namirenje troškova postupka, te se nalaže brisanje ovog društva iz sudskog registra zavedenog pod brojem : 43-05-0028-11, a po pravosnažnosti ovog rješenja.

O b r a z l o ž e n j e

Stečajni dužnik je kao predlagatelj dana 03.07.2024. godine podnio prijedlog za otvaranje stečajnog postupka. Rješenjem ovog suda broj 43 0 St 247657 24 St od 14.01.2025. godine pokrenut je prethodni postupak radi utvrđivanja uvjeta za otvaranje stečajnog postupka, a za privremenog stečajnog upravnika je imenovan Alić Izudin iz Tešnja.

Da bi utvrdio stečajne razloge iz čl. 6. Zakona o stečaju (Sl. novine F BiH, broj: 53/21), sud je zakazao ročište za utvrđivanje uvjeta za otvaranje stečajnog postupka.

Na na ročištu za utvrđivanje uvjeta za otvaranje stečajnog postupka, privremeni stečajni upravitelj je ostao kod pismeno podnesenog izvještaja od 24.02.2025.godine, te je istakao da je odmah po prijemu Rješenja obavio konsultacije sa odgovornom osobom zadruga, kao i sa agencijom za knjigovodstvene poslove koja obavlja računovodstvene poslove za zadrugu. Imajući u vidu tadašnje trenutno materijalno-finansijsko stanje zadruga date su jasne smjernice u smislu nastavka dalje poslovne aktivnosti, kao i potenciranje obaveze odgovorne osobe da prilikom izrade godišnjeg finansijskog izvještaja za 2024. godinu pripremi, obezbijedi i računovođa preda sva dokumenta radi sastavljanja realnog godišnjeg izvještaja. Dalje navodi, da treba napomenuti da je zadruga obavljala poslovnu aktivnost zadnjih godina u „Džananović“ centru i to u pasažu odnosno u zakupljenom dijelu hodnika između ostalih trgovačkih i prodajnih prostora, da je zadruga i prije formalnog podnošenja prijedloga, a što je vidljivo i iz priloženih bilansa dosta smanjila nivo poslovnih aktivnosti, a time i prihoda. Iz poslovnih knjiga vrlo je jasno da zadruga svojim prometom odnosno prihodom ne može u potpunosti pokriti ukupne troškove poslovanja pogotovo ako su proknjiženi svi relevantni finansijski dokumenti. Odgovorna osoba je prilikom sastavljanja godišnjeg finansijskog izvještaja računovođa predala i ostala bitna finansijska dokumenta, tako da je za 2024.

godinu zadruga ostvarila ukupni prihod od 18.135,00 KM, a rashodi su iznosili 31.442,00 KM, tako da je za predmetnu godinu ostvaren gubitak od 13.307,00 KM. Prema Bilansu stanja na dana 31.12.2024. godine u aktivu nema nijedne stavke imovine, znači da je u predmetnoj godini izvršeno unovčavanje zatečenih zaliha trgovačke robe iz prethodnih godina, te skidanje sredstava od strane Poreske uprave FBIH. Dakle sredstva koja su dobivena prodajom zaliha nakon pokretanja prethodnog postupka su uplaćivana na transakcijski račun stečajnog dužnika i ista su od strane banke prosljeđivana prema povjericima odnosno u ovom slučaju Poreskoj upravi FBiH po osnovu čijih Rješenja je i izvršena blokada računa. Prema Bilansu stanja pasivu sačinjava negativni kapital u iznosu od 20.419,00 KM, a sastoji se od akumuliranog gubitka u iznosu od 9.112,00 KM, te gubitka tekućeg perioda odnosno gubitka iz poslovanja za 2024. godinu u iznosu od 13.307,00 KM. Prema priloženoj potvrdi prilikom sastavljanja Izvještaja transakcijski račun je bio blokiran u ukupnom iznosu od 14.178,95KM, a sve po osnovu obaveza po osnovu javnih prihoda. Navodi da se ovaj iznos odnosi isključivo na visinu glavnice bez ostalih sporednih troškova kao što su zatezne kamate, troškovi slanja opomena, troškovi prisilne naplate itd., kao i da su predstavnici KPU Zenica pozivali direktora na razgovore pri čemu su tražili da svojom ličnom imovinom garantuje za obaveze zadruge, a u cilju postizanja dogovora o sporazumnom prolongiranju izmirenja obaveza zadruge, ali do dogovora nije došlo. Prema svemu navedenom stečajni dužnik, odnosno zadruga nije bila niti je sada u mogućnosti da izmiri dospjele obaveze, da je duži vremenski period transakcijski račun blokiran, te je u smislu člana 6. Zakona o stečaju utvrđena platežna nesposobnost stečajnog dužnika. Iako je već navedeno da zadruga nema nikakve imovine, uz Izvještaj su priložena uvjerenja i potvrde od strane institucija u kojima je vidljivo da zadruga nema u vlasništvu nekretnina i pokretnih stvari, da nije upisana kao posjednik u katastru ni kao vlasnik motornih vozila, a nema ni zaliha trgovačke robe. U periodu od sačinjavanja izvještaja do ročišta zadruga odnosno direktor uspio smanjiti dug prema javnim prihodima koji su bili blokirani i to najviše za doprinose za PIO i zdravstveno osiguranje. Navodi da zadruga ne posjeduje imovinu niti sredstva kojim bi mogla ostvarivati barem minimalne prihode za uspješno poslovanje, a pogotovo što je dalje izražen problem ukupnih obaveza prema javnim prihodima koje su u nadležnosti Poreske uprave FBIH. Smatra da su u potpunosti ispunjeni uvjeti za otvaranje stečajnog postupka. Također je činjenica kako je već navedeno da zadruga nema nikakve pokretne i nepokretne imovne čijom prodajom bi se formirala stečajna masa dovoljna barem za podmirenje troškova tečajnog postupka. U skladu sa okolnostima iz člana 63. stav 7 Zakona o stečaju utvrđeno je da organ ovlašten za zastupanje zadruge nije podnio prijedlog za otvaranje stečajnog postupka u roku od 60 dana od dana nastupanja platežne nesposobnosti. Prema potvrdi o blokiranom računu kod Raiffeisen Bank BH d.d., te pregleda Rješenja prinudne naplate od 30.01.2025. godine transakcijski račun stečajnog dužnika blokiran je u visini od 14.178,95 KM. Račun je blokiran na osnovu Rješenja Poreske uprave o prisilnoj naplati prvo Rješenje je od 13.12.2021. godine u iznosu od 33.269,74 KM. Zadruga je veći dio navedene obaveze izvršila s tim da je ostatak duga po provom Rješenju iznosi 11.279,74 KM. Imajući u vidu sve navedeno predlaže da su objavi oglas odnosno poziv za zainteresovane osobe ili povjerioce da u cilju nastavka postupka predujme iznos od 5.000,00 KM na ime troškova stečajnog postupka. Ukoliko u ostavljenom roku niko ne predujmi određeni iznos predlaže da sud donese Rješenje o otvaranju i istovremeno zaključi stečajni postupak nad zadrugom, a naknadno po pravosnažnosti istog briše zadrugu iz sudskog registra.

Zastupnik po zakonu predlagatelja nije imao primjedbe na izvještaj privremenog stečajnog upravnika.

Kako iz izvještaja stečajnog upravnika, dostavljenih dokaza uz izvještaj proizlazi da, iako postoje stečajni razlozi, nema imovine pa ni za troškove stečajnog postupka, to je sud primjenom odredbe člana 102 st. 7 i 8. Zakona o stečaju, po prijedlogu privremenog stečajnog upravnika, Rješenjem od 01.10.2025.godine, objavljeno u „Sl.novinama FBiH“ broj 83/25 od 29.10.2025.godine, pozvao povjerioce i zainteresirana lica da uplate predujam za obezbjeđenje troškova stečajnog postupka.

Kako stečajni dužnik ima obaveze, a nema imovine pa ni za troškove stečajnog postupka, a zainteresirane osobe ni po proteku roka ostavljenom u pomenutom Rješenju nisu predujmili novčani iznos za pokrivanje troškova stečajnog postupka, to je primjenom odredbe čl. 102. stav 8. Zakona o stečaju odlučeno kao u izreci ovog rješenja.

Ovim rješenjem određeno je otvaranje i istovremeno zaključenje stečajnog postupka i brisanje ove pravne osobe iz sudskog registra.

PRAVNA POUKA:

Protiv ovog rješenja dopuštena je žalba Kantonalnom sudu Zenica u roku od 8 dana, putem ovog suda, od dana dostave rješenja.

Stečajni sudija:
Amela Sinanović, s.r.